

31 JUL 2002

LID-MUSEVENI/I

PERKONGSIAN PINTAR PENYELESAIAN TERBAIK, KATA UGANDA

Oleh: Mohd Kamel Othman

LANGKAWI, 31 Julai (Bernama) -- Uganda yang politiknya stabil sejak 16 tahun lepas setelah perang saudara membelenggu negara itu sejak tahun 1970a-an, yakin konsep perkongsian pintar masih merupakan penyelesaian terbaik untuk meletakkan ekonominya pada kedudukan yang kukuh.

"Sejak kami menjalin perkongsian pintar, ekonomi kami semakin berkembang," kata Presiden Uganda Yoweri Museveni dalam satu temubual dengan Pangkalan Data bergerak, Perkongsian Komanwel bagi Pengurusan Teknologi (CPTM).

Pangkalan data itu mengandungi ulasan-ulasan penyokong utama pergerakan perkongsian pintar.

Museveni yang menjadi presiden Uganda sejak 1996, berkata situasi sama-sama menang wujud dalam perkongsian pintar.

"Tidak ada yang tewas, semuanya menang," kata Museveni, 57, yang menyahut idea perkongsian pintar beberapa tahun lepas daripada rakan-rakan dari Selatan Afrika dan Malaysia.

Museveni yang satu masa dahulu merupakan pejuang pembebasan dan kemudiannya mempelajari ekonomi dan sains politik berkata : "Kami sudah pun melaksanakannya (perkongsian pintar) dalam ekonomi kami tanpa mengubah falsafah negara atas sebab-sebab yang pratikal."

Dialog Perkongsian pintar diilhamkan oleh Perdana Menteri Datuk Seri Dr Mahathir Mohamad pada 1995.

Uganda yang mempunyai keluasan 241,139 km persegi dan penduduk seramai 23 juta, terletak antara Great Rift Valley di timur Afrika. Ia bersempadan dengan Kenya di timur, Sudan ke utara, Demokratik Republik Congo (DRC) ke barat dan Tanzania serta Rwanda ke selatan.

Uganda yang mempunyai sejarah politik yang panjang dan kompleks, adalah anggota Pasaran bersama bagi Negara-negara Timur dan Selatan Afrika (COMESA), satu kumpulan 20 negara yang mempunyai pasaran meliputi 300 juta orang.

Sebagai blok perdagangan, COMESA mengimport barangan bernilai lebih daripada US\$17 bilion dan mengeksport lebih US\$13 bilion nilai barangan setiap tahun.

MKO SHY SD LAT